

14 OCT 1999

LIMA '99-Pancaragam

EMPAT PANCARAGAM SERTAI ACARA "SHIP'S CREW STREET MARCH PAST"

LANGKAWI 14 Okt (Bernama) -- Empat pasukan pancaragam termasuk dari Filipina serta pancaragam Tentera Laut Diraja Malaysia (TLDM) dan Polis Diraja Malaysia (PDRM) akan menunjukkan kecekapan masing-masing pada acara lintas hormat di sini pada 3 Dis ini sempena Pameran Maritim dan Udara Antarabangsa Langkawi (LIMA 1999).

Setiausaha Jawatankuasa Kerja Maritim LIMA 1999 Lt Komander Jumali Jabon hari ini berkata pertunjukan itu akan bermula dari Dataran Lang dan berakhir di perkarangan Hotel Tiara sejauh kira-kira 3 kilometer.

Beliau berkata acara "Ship's Crew Street March Past" itu akan turut dijayakan oleh anggota Tentera Laut negara-negara yang menyertai LIMA 1999. LIMA 1999) akan berlansung dari 30 Nov hingga 5 Dis ini.

Menurutnya bagi memeriahkan pertunjukan itu, kira-kira 1,000 murid sekolah akan berbaris di kiri kanan jalan sambil mengibar bendera Malaysia, Kedah dan negara-negara yang mengambil bahagian.

Selain itu, pertunjukan khas perbarisan tanpa arahan akan turut diadakan di pentas utama berhampiran Kompleks LADA di sini.

Perdana Menteri Datuk Seri Dr Mahathir Mohamad dan Menteri Besar Tan Sri Sanusi Junid antara tetamu yang akan hadir menyaksikan pertunjukan itu.

Sementara itu Jumali berkata dua persidangan mengenai Maritim peringkat antarabangsa dan kebangsaan akan diadakan semasa LIMA '99.

Persidangan maritim antarabangsa akan diadakan mulai 1 dan 2 Dis di Hotel Awana membabitkan 150 peserta dalam dan luar negeri manakala persidangan maritim kebangsaan pula akan berlangsung di Hotel Holiday Villa di sini pada 30 Nov yang dijangka disertai 81 peserta dalam negeri.

Beliau berkata persidangan itu adalah sebahagian program menjayakan segmen maritim yang diadakan di Tanjung Malai.

Perasmian segmen maritim dijangka lebih hebat dan menarik termasuk pertunjukan lintas terbang oleh beberapa helikopter Tentera Laut DiRaja Malaysia (TLDM), katanya.

Segmen udara akan diadakan berasingan di Pusat Pameran Antarabangsa Mahsuri di Padang Matsirat di sini.

-- BERNAMA

ZI NH LAT